

ALAHADY V - PAKA - TAONA A



« Izaho no làlana sy fahamarinana ary fiainana; tsy misy olona mankany amin'ny Ray afa-tsy amin'ny alalako » (Jo. 14: 6)

Ry Kristianina havana, matetika isika eo amin'ny fiainantsika no very hevitra noho ny zavamisy, mety sahiran-tsaina tokoa hoy ny fiteny ka manontany tena hoe : mbola misy ve izao Andriamanitra izao, aiza ny lalan-kombàna, aiza ny hiafarana ? Very fanahy mbola velona isika matetika. Ary raha misy fotoana tena hivolagnantsika izany dia izao krizy izao ka samy

manontany tena ho tafita ve isika sa ho rendrika ka hijaly bebe kokoa Ary ny tena mafy ao anatin'izao “maizina” izao dia ny mifanome tsiny ary mifanaratsy mihitsy azy....

Vakiteny I : Asa 6, 1-7
Tononkira : Sal. 32,
Vakiteny II : 1 Pi. 2, 4-9
Evanjely : Jo. 14, 1-12

Androany Alahady fahadimy amin'ny Paka izao dia abaribarin'ireo vakiteny fa ho an'izay mandray an'i Jesoa eo amin'ny fiainany dia Jesoa mpiara-belona, I Jesoa nitsangan-ko velona, nandresy ny ratsy ary anisan'izany ity “fahavalo mitady hanakorontana” ity. Tsy Andriamanitra lavitra ny Andriamanitsika fa Andriamanitra miara-dalana amintsika. Lazainy niany fa làlana Izy ka tsy tokony ho very isika satria Izy no fahazavana rahateo manilo ny fiainantsika. Tsy mandeha amin'ny haizina isika ka tsy ho very na oviana na oviana satria akaiky antsika Izy. Tsara anefa

ny mampitandrina fa marina ny déviations ary maro koa ny mitarika amin'ny déviations maro isan-karazany ka mila mitandrina. Izany indrindra no antony anaovantsika Sinaody mba tsy voafitaka isika.

Jesoa rahateo no fahamarinana, izany hoe misy fototra tsara sy tena maharitra ary tsy ho voahozongozona rehefa manana ny marina. Ireo razantsika nilaza hoe “fisaka ny rariny ka saro-tadiavina”, ka rehefa mahita azy dia izany no famonjena. I Jesoa no marina, Izy no fiainana, Izy no hasambarana sy fiadanana.

Ny Evanjely androany dia vakina matetika amin'ny fotoana fandevenana satria raha mahita ireo havantsika lasan'Andriamanitra isika ka miatrika ny vatana mangatsiaka dia very saina mametra-panontaniana hoe : izao ve no ho fiafarana ? Ireo Apostoly koa dia niaina izany tebiteby izany rehefa nanambara ny fahafatesany i Jesoa. Feno tebiteby indrisy ny fiainantsika matetika ary indrindra tato ho ato ary fantatr'i Jesoa mpiara-belona amintsika izany. Io no nahatonga Azy nilaza tamin'ny Apostoly hoe : “aza mitebiteby ianareo, aoka tsy hitebiteby ny fonareo, minoa an'Andriamanitra”.

Miantefa amintsika androany koa ny Teniny hoe: “*Minoa an'Andriamanitra*”. Io no azo lazaina tena lakile'ny ny fankalazana amin'izao alahady fahadimy izao. Io ny fanalahidy ahafahantsika mahazo ny hafatra rehetra atolotr'ireo vakiteny telo niany. Inona marina ny dikan'ny atao hoe “mino” fa indrindra miatrika ireo zava-mitranga eo amin'ny fiainantsika. Raha ny fampianaran'ny Tenin'Andriamanitra, ny atao hoe “mino” dia mihaino. Mihaino ry Israely... hoy Andriamanitra tamin'ny vahoakany... Tsy an-kandrina izany ny finoana fa manambara fifandraisana. Noho ny Paka dia fifandraisana vaovao no iainantsika ka afaka mifampihaino tsara. Avy nankalaza ny Mpiandry ondry tsara isika ka naverin'i Jesoa Ilay Mpiandry Ondry tsara ny hoe “ny Ondriko dia izay mihaino ny feoko”... Raha izany rehetra izany no jerena dia ny fihainoana an'Andriamanitra no atao hoe “mino”, izany hoe manatanteraka ny hafatr'Andriamanitra henonao, mivelona ny sitrak'Andriamanitra. Koa raha mino isika fa mpiara-belona amintsika Andriamanitra, na dia maro aza ny zavatra mety manahirana antsika, ny tebiteby atrehintsika, ny zavatra mampijaly antsika, ny fahoriana, na dia eo aza ny rivotra mifofofoko mitady handrava ny fiainantsika toa ity areti-mandoza ity, raha apetratsika eo anivon'ny fiainantsika i Jesoa, raha i Jesoa no ekentsika ho mpiara-belona amintsika, dia matoky sy mahafantatra isika fa manamboatra ny toerana ho antsika zanak'Andriamanitra Izy. Tsy “encombré” amin'ny zavatra maro ny fontsika ka manatanteraka ny sitrapony isika ary dia hanamboatra ny fiainantsika izy. Io ilay averintsika matetika : raha manao ny asan'Andriamanitra isika izany hoe manao sitrapon'ny Ray izay naniraka an'i Jesoa, mihaino ny feony, dia Izy Andriamanitra hanao ny asantsika izany hoe hanamboatra ny fiainantsika... Matetika anefa tsy manao ny asan'Andriamanitra isika olombelona ary dia hitantsika ny vokany amin'izao. Matetika isika tsy mihaino ny feony ka io no mahatonga ny fiainantsika mikoroso fahana.

Tsy fitadiavana toerana ny finoana fa fametrahana ny anjara toerana maha zanak'Andriamanitra an'i Jesoa. Raha ny marina izany dia i Jesoa no manamboatra ny toerany ao amintsika, *“hanamboatra toerana ho anareo aho, ka izay misy ahy no hisy anareo”*, aoka àry hoesorintsika hiala ireo “encombrement” rehetra. Aoka ho Izy Andriamanitra no tompon'ny fontsika ka ny fontsika amin'izay dia ho fon'Andriamanitra, izay hiainantsika eto an-tany no hiainantsika koa any an-danitra.

Nilaza i Jesoa hoe : “**IZAHO NO LALANA SY FAHAMARINANA ARY NY FIAINANA**”. Mamakivaky an'ity fiainana ity isika ka izay misy an'i Jesoa no misy antsika. Ny tadiavin'i Jesoa dia isika mahalala ny alehany, tahaka ny navaliny an'i Tomà hoe Izy no làlana sy fahamarinana ary fiainana, Izy sy ny Ray dia iray ihany.

Izany no maha-mpiara-belona Azy ho antsika satria ao amintsika Izy, ao amintsika koa ny Trinite masina satria olo araiky amin'Andriamanitra isika. Na dia mafy aza ny rivotra amin'izao tontolo izao, na dia mafy aza ny fakam-panahy dia mitari-dàlana antsika i Jesoa, raha mino Azy isika dia hanao ny asa maha-zanak'Andriamanitra antsika isika. Izany no vokatry ny batemy eo amin'ny fiainantsika, entanin'ny Fanahy masina isika ka afa-manentana ny hafa koa, tsy ho very izay miaraka amintsika satria marina ny fiainantsika, olona afaka isika. Izay manao ny marina no hendry, izany no tadiavin'i Jesoa amintsika. Tsy hoe mandeha ho azy ny fiainantsika fa raha eo anivontsika Izy dia miaraka Aminy isika mandavorary ny fiainantsika. *“Aoka ho lavorary ianareo tahaka ny fahalavorarian'ny Ray”*. Entanin'ny Fanahy masina isika, entanin'ny fanilovan'ny Tenin'Andriamanitra ary ankaherezin'ireo sakramenta izay manamasina ny fiainantsika sy ny finoantsika *“Katolika vita batemy aho, manome hasina ny finoako”*. Izany ny vokatry ny PAKA eo amin'ny fiainantsika. Izany ny vokatry ny ezaka ataontsika mameno ireo sajoa saota araka ny hafatr'i Masina Maria amintsika : “Ataovy izay lazainy aminareo” izay azo adika hoe “henoy tsara anaka ny teny atao aminareo”. Volan'i Masina Maria isika izao. Miaraka amin'i Papa manao Raozery isika ka aoka samy hiezaka mafy hameno ireo sajoa saota : mivavaka , mandalim-pinoana, manompo, mandray an-tanana, mivory ary mankalaza.

Voalaza ao amin'ny vakiteny faharoa fa *“Taranaka voafidy, mpisorona manjaka”* isika satria efa ao amintsika ny asan'ny Fanahy masina ka afaka manolotra fanatitra ara-panahy ankasitrahin'Andriamanitra isika. Entanin'izany Fanahy masina izany isika ka ny fiainantsika manontolo no fanatitra ho an'Andriamanitra.

Ny vakiteny voalohany manambara fa nisy ny fifandaminana natao teo anivon'ny Eglizy rehefa nisafidy ireo olona hanatanteraka ny asa fanasoavana ireo apostoly. Izany no anton'ny nifidianana ireo diakra 7 lahy. Tsy hoe hanompo ny apostoly ireo Diakra ireo fa kosa manana asa sy andraikitra ao amin'ny Eglizy ka fampianarana velona ho antsika io taratasin'ny Apostoly io. *“Tsy mety raha ilaozanay mitandrina ny sakafo, ny fampianarana ny tenin'Andriamanitra. Koa amin'izany, ry rahalahy Havana iray finoana, mifidiana fito lahy eo aminareo, izay tsara laza sady feno ny Fanahy Masina sy fahendrena, mba hametrahanay*

izany raharaha izany; ary izahay kosa hikely aina amin'ny fivavahana sy ny fitorianteny"..... Narosony teo anatrehan'ny Apôstôly izy ireo, ka nametrahany tanana nony efa vita ny fivavahana. Dia niely ny tenin'Andriamanitra, nihamaro be dia be ny mpianatra tao Jerosalema, ary betsaka koa ny mpisorona nanaiky ny finoana."

Hamarinin'ny vakiteny voalohany amin'izao Alahady faha-5 amin'ny Paka izao fa miroso amin'ny tena fiainana andavanandro ny Eglizy ka io no mahatonga antsika milaza ny fampitrahaofana ny finoana sy ny fiainana andavanandro izay mampiseho ny maha-kristianina antsika. Fampiharana ireo voalaza teny am-boalohany izany dia ny fandraisana an'i Jesoa lalana, fahamarina ary fiainana.

Mpiara-belona amintsika i Jesoa, mpiara-belona amintsika ny Eglizy, mizara ny manta sy masaka ao amin'ny Eglizy kely dia ny fianakaviana, ao amin'ny Eglizy iraka ary ny Eglizy fiombonana isika.

Miainga avy amin'ny Eglizy kely ny fiainana maha-Kristianina antsika, ao no hivelomantsika ny finoana, izany no nahatonga ireo apostoly nametraka io fifandaminana io izay mbola lovan'ny Eglizy hatramin'izao.

Tamin'ny Alahady fahaefatry ny Paka lasa teo dia nahatsiaro ireo mpanara-dia akaiky an'i Jesoa dia ny Papa, ny eveka, ny pretra, ny diakra isika. Nivavaka isika mba ho mpanompo mahatoky izy ireo.

Enga anie izahay ry JESOA TOMPO ho vonona mandrakariva hamaly ny antsom-pitiavanao izahay, hanompo ny Eglizy, hanompo ireo manodidina anay fa indrindra ireo izay sahirana. Ampio izahay hahay hampitraotra ny finoana sy fiainana andavanandro hampiseho fa lanao tokoa no lalana sy fahamarinana ary fiainana mba ho tanteraka ny vavaka ataonao hoe : "mba ho iray anie izy rehetra".

Hampanjaka tokoa ny fahamarinana, ny rariny sy ny hitsiny ka hivelona ao anatin'ny fiadanana marina anie izahay mba ho fanehoam-pitiavana Anao. Amen

Mompera Arseveka Mgr Benjamin Ramaroson